

## **Акафист Пресвятой Богородице пред иконой «Трех радостей»**

--

### **Кондак 1**

Взбранной Воеводе не умолчим никогда глаголати мы недостойний,  
Всесвятая Дево, рождшая на спасение наше Радость вечную, всякое уныние и  
печаль отжени от нас, да зовем Ти: Радуйся, Радосте наша, во объятиях  
Своих Радость всего мира носившая.

### **Икос 1**

Тайну от века открывая Тебе, Пренепорочная Дево, Гавриил, безплотных  
архистратиг, со страхом вопияше: Радуйся, Благодатная, Господь с Тобою!  
Мы же грешни нечистыми устнами дерзаем вопити Тебе сице:

Радуйся, благословенная в женах; радуйся, Богоневесто.

Радуйся, виноградная лозо; радуйся, в рождестве и по рождестве Дева.

Радуйся, цвете неувядаемый; радуйся, чистоты сокровище.

Радуйся, кадило благовонное; радуйся, миро многоценное.

Радуйся, одушевленная трапезо; радуйся, Света невечерняго жилище.

Радуйся, всего мира очищение; радуйся душ наших освящение.

Радуйся, Радосте наша, во объятиях Своих Радость всего мира носившая.

### **Кондак 2**

Исполни веселия сердце мое, утоли печаль мою, Пресвятая Дево! Просвети  
светом нетленыя радости мою скорбную душу, да взываю Создателю моему:  
Аллилуя.

### **Икос 2**

Разум человеческий не может уразумети, како Ты, неискусобрачная Дево,  
имела еси во утробе над всеми Бога и родила еси нетленного Сына, темже со  
страхом взываем Тебе:

Радуйся, земле ненасеянная; радуйся, купино неопалимая.

Радуйся, глубино неудобозримая; радуйся, мосте, к небесем приводяй.

Радуйся, лествице высокая, юже Иаков виде; радуйся, Божественная стамно Манны.

Радуйся, разрешение клятвы; радуйся, Адамово возвзвание.

Радуйся, врата адовы сокрушившая; радуйся, тьму греховную разрушившая.

Радуйся, Радосте наша, во объятиях Своих Радость всего мира носившая.

### **Кондак 3**

Ты предстательство и покров моя жизни, надежда и утверждение мое,  
Всепетая, исцели мою душу, зараженную проказою греховною, да воспою  
Небесному Жениху во веки: Аллилуя.

### **Икос 3**

Всевышняго освященное Божественное селение, радуйся, Тобою бо дадеся  
радость Богородице зовущим:

Радуйся, чистейшая светлостей солнечных; радуйся, пребывание Творца неба  
и земли.

Радуйся, ангелов радосте; радуйся, всечудное всех к Богу примирение.

Радуйся, Честнейшая Херувим; радуйся, Славнейшая без сравнения  
Серафим.

Радуйся, радуйся, стено и защищение наше от врагов; радуйся демонов  
поражение и ослепление.

Радуйся, радуйся, двери райских нам отверзающая; радуйся, Марие, Госпоже  
всех нас.

Радуйся, Радосте наша, во объятиях Своих Радость всего мира носившая.

### **Кондак 4**

Унынием и многими скорбьми исполнено мое сердце, к кому же возопию,  
Владычице, к кому прибегну в горести моей, кому возвещу печаль мою, кто  
плач и вздохание мое услышит, аще не Ты, Богородице, рождшая на  
радость Небу и земли Царя Христа Бога нашего, Ему же поют с нами  
Херувимы и Серафимы: Аллилуя.

## **Икос 4**

Никогда не умолчим и не отступим от Тебе, Владычице, Твоя бо рабы спасаeshи присно от всяких лютых бед и скорбей, темже припадаем к Тебе и с умилением поем:

Радуйся, всех скорбящих Радосте; радуйся, взыскание погибших.

Радуйся, обидимых Заступнице; радуйся, алчуших питательнице.

Радуйся, странных Утешение; радуйся обуреваемых Пристанище.

Радуйся, больных посещение; радуйся, немощных Покрове и Помощнице.

Радуйся, жезле старости; радуйся, Мати Бога нашего.

Радуйся, Радосте наша, во объятиях Своих Радость всего мира носившая.

## **Кондак 5**

Заступнице мира, возвесели всех прибегающих к Тебе, Матери высшей Радости, покрый нас честным Твоим омофором от всяких бед, напастей, скорбей и болезней, да поем Богу: Аллилуя.

## **Икос 5**

Моление крепкое, стено необоримая, милости источниче, всех православных прибежище, Богородице Дево! Приими от нас ангельское пение:

Радуйся, радосте и славо верующих; радуйся, всех святых непреложное упование.

Радуйся, скорое в бедах избавление; радуйся, готовое в нуждах утешение.

Радуйся, Боговместимое жилище; радуйся, бездно щедрот и благостины.

Радуйся, одушевленный храме; радуйся, сирот и вдовиц сладостное веселье.

Радуйся, неистощимое богатство; радуйся, Невесто неневестная.

Радуйся, Радосте наша, во объятиях Своих радость всего мира носившая.

## **Кондак 6**

Во время живота моего не остави мене, Мати Божия, и конец благий получить мя сподоби, дазываю Спасителю Богу: Аллилуя.

## **Икос 6**

Искушения всякаго и страстей избави мя, Всенепорочная! Ущедри, спаси, взвесели мя и от лютых врагов избави и защити, да выну взываю Тебе:

Радуйся, крепкое и непоколебимое упование наше; радуйся, всех Царице и Владычице.

Радуйся, всея вселенныя великое сокровище; радуйся, всех верных утверждение.

Радуйся, заступнице усердная рода христианского; радуйся, рождшая всех святых святейшее Слово.

Радуйся, небесный престоле; радуйся, источниче неизсякаемый Воды живыя.

Радуйся, ограждение и священное прибежище на Тя надеющихся; радуйся, представительство христиан непостыдное.

Радуйся, Радосте наша, во объятиях Своих Радость всего мира носившая.

## **Кондак 7**

В час кончины моей, Всеблагая, предстани мне и убогую мою душу во исходе от окаянного тела моего обрадуй, да воспою Победителю смерти и ада: Аллилуиа.

## **Икос 7**

Лица Твоего радостнаго не отврати от мене, Богородительнице! Услыши мольбу мою, и вопль мой к Тебе да приидет, Дево Пресвятая! Воньже аще день призову Тя, скоро услыши мя, да взываю Тебе сице:

Радуйся, торжественное пение Ангелов; радуйся, Апостолов похвало.

Радуйся, пресвитеров красото; радуйся страдальцев венчание.

Радуйся, столпе девства; радуйся, слез Евиных избавление.

Радуйся, постников воздержание; радуйся, живота нетленнаго веселье.

Радуйся, монахов умиление; радуйся, святителей удобрение.

Радуйся, Радосте наша, во объятиях Своих радость всего мира носившая.

## **Кондак 8**

Со светлой свещею благоволила, Пречистая, изыти во сретение Жениха душ наших, даруй и мне бодренным сердцем и трезвенною мыслию настоящаго жития нощь прейти и в радостный чертог славы Его внити и пети Судии всех Богу: Аллилуиа.

## **Икос 8**

Едина непорочная и чистая Дево, небеснаго веселия улучти со всеми святыми сподоби всех нас и сродников наших, други и знаемыя, да упокоит их Господь всесильными Твоими молитвами, Пречистая, в месте светле, идеже несть болезни, ни печали, ни вздохания, но жизнь безконечная. Да простит им Господь всякое согрешение, содеянное ими от юности до смертнаго часа их, да взывают и они с нами:

Радуйся, во успении Своем нас не оставившая; радуйся, Мати Жизни.

Радуйся, избавляющая от смерти души наша; радуйся, в молитвах неусыпающая Богородице.

Радуйся, райских радости нас приобщающая; радуйся, Бога плотию рождшая.

Радуйся, от рова погибели нас спасающая; радуйся, радостное упокоение всех в вере и надежде скончавшихся.

Радуйся, Надеждо ненадежных; радуйся, милосердия двери нам отверзающая.

Радуйся, Радосте наша, во объятиях Своих Радость всего мира носившая.

## **Кондак 9**

Избави, Богородительнице, нас, грешных рабов Твоих, геенны огненные, тьмы несветимые, муки адская и сподоби жизни нестареющейся, да поем всегда Сладчайшему Иисусу: Аллилуиа.

## **Икос 9**

Пречистая Дево, Твоим ходатайством пред престолом Всевышняго освяти мою душу и тело, ум и сердце, всего мя обнови, украси, уцеломудри, прослави, спаси, просвети, и благослови Своим небесным и земным благословением, да взываю Ти:

Радуйся, неневестная Мати и неискусобрачная; радуйся, яко Тобою Сына Божия познахом.

Радуйся, нерушимая стено; радуйся, всесовершенное спасение душ наших.

Радуйся, Владычице и Мати Избавителя от вечныя смерти; радуйся, святых святейшая ангелов.

Радуйся, яко воистину из Тебе Господь воцарися и в лепоту облечеся; радуйся, греховную отъемлющая скверну.

Радуйся, утра весенняго светлейшая; радуйся, свирепую бурю души моей укрощающая.

Радуйся, Радосте наша, во объятиях Своих радость всего мира носившая.

### **Кондак 10**

Утверди, Богородице Дево, в Православии всех благоверных российских людей, покрый их Твоим честным омофором от всякаго зла, да поют Богу: Аллилуия.

### **Икос 10**

Боголюбивая Дево Марие, Госпоже Богородице безневестная, верных спасение и надеждо! Ты бо имаши многое дерзновение к Небесному Царю, воплотившемуся из Тебе, избави нас от скорбей лютых и печали горькия. Утешения и радости просим у Тебе, Радосте наша, наипаче же спасения вечнаго требуем от Тебе, умиленно взывающе:

Радуйся, Хлеб жизни, Божественнааго Агнца, рождшая; радуйся, лозо виноградная, возрастившая нам Плод живота.

Радуйся, вином небесныя радости нас напояющая; радуйся, святых, небесных, страшных, Божественных и бессмертных, и животворящих Христовых Таин верных сподобляющая.

Радуйся, Света невечерняго Таиннице неизреченная; радуйся, свете помраченныя моей души.

Радуйся, покрове и Надеждо моя; радуйся, прибежище мое.

Радуйся, утешение мое; радуйся, радование мое.

Радуйся, Радосте наша, во объятиях Своих радость всего мира носившая.

### **Кондак 11**

Дверь небесную верным отверзающая, покаяния двери отверзи ми, Богородице, да помилует мя Праведнейший Судия, да не явит моих тайных

прегрешений и не посрамит мене пред Ангелы Своими, да пою Ему во веки:  
Аллилуя.

## Икос 11

Очисти мя, Пречистая, от всяких скверн плоти и духа, отжени от мене  
уныние, просвети моя мысли сердечные, подаждь ми память смертную,  
сохрани сердце мое от похотей лукавых и услыши мя вопиющего:

Радуйся, Царице моя Преблагая; радуйся, Заступнице моя  
Преблагословенная.

Радуйся, труждающихся помощнице; радуйся, обидимых Заступнице.

Радуйся, отрадо и утешение плачущих; радуйся, утешение в смерти моей.

Радуйся, веселье души моей; радуйся, красото Церкви.

Радуйся, просвещение ума моего; радуйся, всех христиан утешение.

Радуйся, Радость наша, во объятиях своих Радость всего мира носившая.

## Кондак 12

Во светlostех святых Твоих како вниду недостойный аз, Боже, Боже мой!  
Аще бо дерзну совнити в чертог, одежда мя обличает, яко несть брачна.  
Просвети одеяние души моей, Жизнодавче, молитвами Богородицы, да пою  
Тебе: Аллилуя.

## Икос 12

О небесный, о любезный, о сладчайший Твой глас, веселящий сердца наша!  
С нами бо неложно обещалася еси быти до скончания века, Дево Богородице!  
Твоими бо молитвами слепии видят, глухия слышат, хромии ходят,  
прокаженни очищаются, алчущии пытаются, назии одеваются, вдовицы  
утешаются, сироты радуются, нищии веселятся, грешницы спасаются, убозии  
ликуют, воспевающе:

Радуйся, одушевленный Божий Кивоте; радуйся, Боголюбивая Царице и  
Владычице.

Радуйся, от глада и губительства, труса и потопа нас спасающая; радуйся, от  
огня, меча, нашествия иноплеменных и междуусобных браны нас  
защищающая.

Радуйся, бурные волны житейского моря укрощающая; радуйся, всякую  
слезу с очей наших отирающая.

Радуйся, яко воистину любовию материнскою нас возлюбившая; радуйся, подательнице Божественных благости.

Радуйся, во чреве Своем Радость вечную носившая; радуйся, яко тихое пристанище душам нашим готовиши.

Радуйся, Радосте наша, во объятиях Своих Радость всего мира носившая.

### Кондак 13

О, Всепетая Мати, Пречистая Госпоже Дево Богородице! Приими сие малое моление наше, Заступнице крепкая сущих в скорбех и печалех; умоляем Тя честным и животворящим крестом Сына Твоего, Господа нашего Иисуса Христа: подаждь нам дух сокрушенный, сердце смиренное, слезы умиления, многих согрешений наших прощение и радость неувядаемую, да поем в горнем Иерусалиме Спасителю Богу: Аллилуиа.

*Этот кондак читается трижды, затем 1-й икос «Тайну от века...» и 1-й кондак «Взранной Воеводе...».*

### Молитва

О Пресвятая Дево, всеблагого Сына Мати всеблагая, царствующаго града и святаго храма сего покровительнице, всем сущим во гресех, скорбех, бедах и болезнех верная предстательнице и заступнице! Не презри моления нас, недостойных рабов Твоих, и умоли Сына Твоего и Бога нашего, да всем нам, с верою и умилением поклоняющимся пред чудотворным образом Твоим, дарует по коегождо потребе радость: сущим в скорбех и печалех утешение, бедствующим милосердие, сущим в многонедужии нечаемое исцеление и укрепление. О Госпоже Пресвятая, умилосердися ко всем чтущим всечестное имя Твое и всем яви всемощный покров Твой и заступление: всякому делу, Сыну Твоему угодному споспешствуй; всякое дело злое разруши; в недоумении и трудных и опасных обстоянних обретающимся незримую помошь и вразумление с небесе ниспосли. Младенцы воспитай, юныя уцеломудри, отверзи им ум к приятию всякаго полезнаго учения. От домашния брани и от врагов видимых и невидимых защити и сохрани. Супружества в любви и единомыслии сохрани и от вражды единокровных миром и любовию огради. И всем нам дажь друг ко другу любовь, мир и благочестие, и здравие с долголетием. Преставившияся в вере и покаянии от жития сего со ангелы и всеми святыми жити сотвори, да вси на Небеси и на земли ведят Тя яко твердую и непостыдную Предстательницу нашу, рода христианского, и, ведуще, славят Тя и Тобою Сына Твоего, со Безначальным Его Отцем и Единосущным Его Духом, ныне и присно и во веки веков.

Аминь.

## **Тропарь, глас 4**

От святыя иконы Твоей радости неизреченные преисполнила еси сердце благочестивыя жены. О Пречистая Владычице мира, Всемощная Царица радосте, Приснодево твари, егда возвратила оной и мужа, и сына, и достояние ея, такожде и всем нам милосердствуеш, даруй исполнение благих желаний, источая приснотекущий источник радости молящимся Тебе и вседушно вопиющим: Радость всему миру родившая, радости исполни неоскудевающая чутущих Тя.

## **Кондак, глас 6**

Не имамы иных помощи, не имамы иных надежды, разве Тебе, Владычице. Ты нам помози, на Тебе надеемся и Тобою хвалимся, Твои бо есмы раби, да не постыдимся.

## **Величание**

Величаем Тя, Пресвятая Дево, богоизбранная Отроковище, и чтим образ Твой святый, имже точиши исцеления всем с верою притекающим.